

四庫全書

集部

欽定四庫全書

集部

西漢文紀卷十二

詳校官庶吉士臣謝恭銘

主事銜臣徐以坤覆勘

覆校官博士臣劉光第

校對官中書臣孫球

謄錄監生臣馮光煦

欽定四庫全書

西漢文紀卷十二

明梅鼎祚編

霍光

字子孟票騎將軍去病異母弟任為郎歷位大將軍封博陸侯擁昭立宣

廢昌邑王奏

昌邑王賀昌邑哀王子武帝孫既立行淫亂光憂慙因決計於大司

農田延年與丞相楊敞等白皇太后廢之太后被珠襦坐武帳中侍御數百人陳列殿下羣臣以次上殿召王伏前聽奏光與羣臣連名奏王尚書令讀奏皇太后詔曰可廢賀歸

昌邑

丞相臣敞大司馬大將軍臣光車騎將軍臣安世度遼

將軍臣明友前將軍臣增後將軍臣充國御史大夫臣
誼宜春侯臣譚當塗侯臣聖隨桃侯臣昌樂杜侯臣屠
耆堂太僕臣延年太常臣昌大司農臣延年宗正臣德
少府臣樂成廷尉臣光執金吾臣延壽大鴻臚臣賢左
馮翊臣廣明右扶風臣德長信少府臣嘉典屬國臣武
京輔都尉臣廣漢司隸校尉臣辟兵諸吏文學光祿大
夫臣遷臣畸臣吉臣賜臣管臣勝臣梁臣長韋臣夏侯
勝大中大夫臣德臣卬昧死言皇太后陛下臣敞等頓

首死罪天子所以永保宗廟總壹海內者以慈孝禮誼
賞罰為本孝昭皇帝早棄天下亡嗣臣敞等議禮曰為
人後者為之子也昌邑王宜嗣後遣宗正大鴻臚光祿
大夫奉節使徵昌邑王典喪服斬縗亡悲哀之心廢禮
義居道上不素食使從官略女子載衣車內所居傳舍
始至謁見立為皇太子常私買雞豚以食受皇帝信璽
行璽大行前就次發璽不封從官更持節引內昌邑從
官騶宰官奴二百餘人常與居禁閤內教戲自之符璽

取節十六朝暮臨令從官更持節從為書曰皇帝問侍
中君卿使中御府令高昌奉黃金千斤賜君卿取十妻
大行在前殿發樂府樂器引內昌邑樂人擊鼓歌吹作
俳倡會下還上前殿擊鍾磬召內泰壹宗廟樂人輦道
牟首鼓吹歌舞悉奏衆樂發長安厨三太牢具祠閣室
中祀已與從官飲啗駕法駕皮軒鸞旗驅馳北宮桂宮
弄彘鬪虎召皇太后御小馬車使官奴騎乘遊戲掖庭
中與孝昭皇帝宮人蒙等淫亂詔掖庭令敢泄言要斬

取諸侯王列侯二千石綬及墨綬黃綬以并佩昌邑郎
官者免奴變易節上黃旌以赤發御府金錢刀劔玉器
綵繒賞賜所與遊戲者與從官官奴夜飲湛沔於酒詔
太官上乘輿食如故食監奏未釋服未可御故食復詔
太官趣具無關食監太官不敢具即使從官出買雞豚
詔殿門內以為常獨夜設九賓溫室延見姊夫昌邑關
內侯祖宗廟祠未舉為璽書使使者持節以三太牢祠
昌邑哀王園廟稱嗣子皇帝受璽以來二十七日使者

旁午持節詔諸官署徵發凡千一百二十七事文學光祿大夫夏侯勝等及侍中傅嘉數進諫以過失使人簿責勝縛嘉繫獄荒淫迷惑失帝王禮誼亂漢制度臣敞等數進諫不變更日以益甚恐危社稷天下不安臣敞等謹與博士臣霸臣雋舍臣德臣虞舍臣射臣倉議皆曰高皇帝建功業為漢太祖孝文皇帝慈仁節儉為太宗今陛下嗣孝昭皇帝後行淫辟不軌詩云藉曰未知亦既抱子五辟之屬莫大不孝周襄王不能事母春秋

曰天王出居于鄭繇不孝出之絕之於天下也宗廟重於君陛下未見命高廟不可以承天序奉祖宗廟子萬姓當廢臣請有司御史大夫臣誼宗正臣德太常臣昌與太祝以一大牢具告祠高廟臣敞等昧死以聞

請立宣帝奏

帝衛太子孫病已號皇曾孫在民間咸稱述焉光復與敞等上奏皇

太后詔可迎立之是為宣帝

禮曰人道親親故尊祖尊祖故敬宗太宗無嗣擇支子孫賢者為嗣孝武皇帝曾孫病已武帝時有詔掖庭養

視至今年十八師授詩論語孝經躬行節儉慈仁愛人
可以嗣孝昭皇帝後奉承祖宗廟子萬姓臣昧死以聞

並漢書

丙吉

字少卿魯國人為魯獄史宣帝時為御史大夫封博陽侯代魏相為丞相

與魏相書

相遷揚州刺史考按守相多所貶退相與吉
善吉為光祿大夫與相書相心善其言為霽
威嚴居部二歲徵為諫大夫復
為河南太守數年而宣帝即位

朝廷已深知弱翁治行方且大用矣願少慎事自重藏

器於身不顯其能

奏記霍光

吉武帝末以故廷尉監徵治巫蠱郡邸獄時
宣帝生數月以皇曾孫坐衛太子事繫吉重
哀曾孫無辜保養視遇甚有恩惠及為軍市
令遷大將軍長史光甚重之入為光祿大夫
給事中及昌邑王既廢大臣議所立未
定吉奏記光光覽其議遂尊立皇曾孫

將軍事孝武皇帝受襁褓之屬任天下之寄孝昭皇帝
早崩亡嗣海內憂懼欲亟聞嗣主發喪之日以大誼立
後所立非其人復以大誼廢之天下莫不服焉方今社

稷宗廟群生之命在將軍之壹舉竊伏聽於衆庶察其所言諸侯宗室在位列者未有所聞於民間也而遺詔所養武帝曾孫名病已在掖廷外家者吉前使居郡邸時見其幼少至今十八九矣通經術有美材行安而節和願將軍詳大議參著龜豈宜褒顯先使入侍令天下昭然知之然後決定大策天下幸甚

並漢書

魏相

字弱翁濟陰定陶人徙平陵初為郡卒史舉賢良為茂陵令歷位丞相封高平侯

對策

韓義為燕郎中刺王謀逆諫而死昭帝初相以文學對策請顯其子擢義子延壽為

大 夫

賞罰所以勸善禁惡政之本也日者燕王為無道韓義出身彊諫為王所殺義無比干之親而蹈比干之節宜顯賞其子以示天下明為人臣之義

尊張安世封事

大將軍光薨相奏以領光祿勳張安世為大將軍而以其子延

壽為安世官安世深辭弗能得

聖王褒有德以懷萬方顯有功以勸百僚是以朝廷尊榮天下鄉風國家承祖宗之業制諸侯之重新失大將

軍宜宣章盛德以示天下顯明功臣以填藩國毋空大位以塞爭權所以安社稷絕未萌也車騎將軍安世事孝武皇帝三十餘年忠信謹厚勤勞政事夙夜不怠與大將軍定策天下受其福國家重臣也宜尊其位以為大將軍毋令領光祿勲事使專精神憂念天下思惟得失安世子延壽重厚可以為光祿勲領宿衛臣

上言霍氏封事

大將軍光薨上思其功德以子禹為右將軍兄子山領尚書事

漸驕恣相時為御史大夫因許伯奏封事○山乃光兄孫作兄子誤

春秋譏世卿惡宋三世為大夫及魯季孫之專權皆危
亂國家自後元以來祿去王室政繇冢宰今光死子復
為大將軍兄子秉樞機昆弟諸壻據權執在兵官光夫
人顯及諸女皆通籍長信宮或夜詔門出入驕奢放縱
恐竄不制宜有以損奪其權破散陰謀以固萬世之基
全功臣之世

諫擊匈奴書

相為丞相總眾職甚稱上意元康中匈奴遣兵擊漢屯田車師者不

能下上與充國等議欲因匈奴衰弱出兵擊其右地使不敢復擾西域相上書諫乃止

臣聞之救亂誅暴謂之義兵兵義者王敵加於已不得已而起者謂之應兵兵應者勝爭恨小故不忍憤怒者謂之忿兵兵忿者敗利人土地貨寶者謂之貪兵兵貪者破恃國家之大矜民人之衆欲見威於敵者謂之驕兵兵驕者滅此五者非但人事乃天道也間者匈奴嘗有善意所得漢民輒奉歸之未有犯於邊境雖爭屯田車師不足致意中今聞諸將軍欲興兵入其地臣愚不知此兵何名者也今邊郡困乏父子共犬羊之裘食草

萊之實常恐不能自存難以動兵軍旅之後必有凶年
言民以其愁苦之氣傷陰陽之和也出兵雖勝猶有後
憂恐災害之變因此以生今郡國守相多不實選風俗
尤薄水旱不時案今年計子弟殺父兄妻殺夫者凡二
百二十二人臣愚以為非小變也今左右不憂此乃欲
發兵報讎介之忿於遠夷殆孔子所謂吾恐季孫之憂
不在顓臾而在蕭牆之內也願陛下與平昌侯樂昌侯
平恩侯及有識者詳議乃可

條國家便宜奏

相明易經有師法好觀漢故事及便宜章奏數條漢興已來國

家行事及賢臣貴誼量錯董仲舒等所言奏請施行采易陰陽及明堂月令表奏之上並

納用焉

臣聞明主在上賢輔在下則君安虞而民和睦臣相幸得備位不能奉明法廣教化理四方以宣聖德民多背本趨末或有饑寒之色為陛下之憂臣相罪當萬死臣相知能淺薄不明國家大體時用之宜惟民終始未得所繇竊伏觀先帝聖德仁恩之厚勤勞天下垂意黎庶

憂水旱之災為民貧窮發倉廩振乏餽遣諫大夫博士
巡行天下察風俗舉賢良平冤獄冠蓋交道省諸用寬
租賦弛山澤陂池禁秣馬酤酒貯積所以周急繼困慰
安元元便利百姓之道甚備臣相不能悉陳昧死奏故
事詔書凡二十三事臣謹案王法必本於農而務積聚
量入制用以備凶災亡六年之畜尚謂之急元鼎三年
平原勃海太山東郡溥被災害民餓死於道路二十石
不豫慮其難使至於此賴明詔振捄乃得蒙更生今歲

不登穀暴騰踊臨秋收歛猶有乏者至春恐甚無以相恤西羌未平師旅在外兵革相乘臣竊寒心宜蚤圖其備唯陛下留神元元帥繇先帝盛德以撫海內

采明堂月令奏

臣相幸得備員奉職不修不能宣廣教化陰陽未和災害未息咎在臣等臣聞易曰天地以順動故日月不過四時不忒聖王以順動故刑罰清而民服天地變化必繇陰陽陰陽之分以日為紀日冬夏至則八風之序立

萬物之性成各有常職不得相干東方之神太昊乘震
執規司春南方之神炎帝乘離執衡司夏西方之神少
昊乘兌執矩司秋北方之神顓頊乘坎執權司冬中央
之神黃帝乘坤艮執繩司下土茲五帝所司各有時也
東方之卦不可以治西方南方之卦不可以治北方春
興兌治則饑秋興震治則華冬興離治則泄夏興坎治
則電明王謹于尊天慎于養人故立羲和之官以乘四
時節授民事君動靜以道奉順陰陽則日月光明風雨

時節寒暑調和三者得叙則災害不生五穀孰絲麻遂
少木茂鳥獸蕃民不夭疾衣食有餘若是則君尊民說
上下亡怨政教不違禮讓可興夫風雨不時則傷農桑
農桑傷則民饑寒饑寒在身則亡廉恥寇賊姦宄所繇
生也臣愚以為陰陽者王事之本羣生之命自古聖賢
未有不繇者也天子之義必純取法天地而觀於先聖
高皇帝所述書天子所服第八曰大謁者臣章受詔長
樂宮曰令羣臣議天子所服以安治天下相國臣何御

史大夫臣昌謹與將軍臣陵太子太傅臣通等議春夏
秋冬天子所服當法天地之數中得人和故自天子王
侯有土之君下及兆民能法天地順四時以治國家身
亡禍殃年壽永究是奉宗廟安天下之大禮也臣請法
之中謁者趙充舉春李舜舉夏兒湯舉秋貢禹舉冬四
人各職一時大謁者襄章奏制曰可孝文皇帝時以二
月施恩惠於天下賜孝弟力田及罷軍卒祠死事者頗
非時節御史大夫鼂錯時為太子家令奏言其狀臣相

伏念陛下恩澤甚厚然而災氣未息竊恐詔令有未合當時者也願陛下選明經通知陰陽者四人各主一時至明言所職以和陰陽天下幸甚

劾趙廣漢自陳書

廣漢為京兆尹坐枉殺事下丞相魏相伺得丞相傳婢有

過因丞相笞之出外舍自絞死上書告丞相罪制下京兆尹遂將吏卒入丞相府責夫人以妬殺相上書自陳司直蕭望之奏廣漢摧辱大臣欲以刳持奉公逆節傷化不道及它

斬事腰

妻實不殺婢廣漢數犯罪法不伏辜以詐巧迫脅臣相

韋臣相寬不奏願下明使者治廣漢所驗臣相家事

並漢書

黃霸

字次公淮陽陽夏人為潁川太守以治行徵守京兆尹歷位丞相

呼韓單于朝位議

甘露二年呼韓邪單于來朝詔公卿議其儀丞相黃霸御

史大夫于定國議位在諸侯王下蕭望之議宜位在諸侯王上宣帝從望之下詔

聖王之制施德行禮先京師而後諸夏先諸夏而後夷狄詩云率禮不越遂視既發相土烈烈海外有截陛下聖德充塞天地光被四表匈奴單于鄉風慕義舉國同

心奉珍朝貢自古未之有也單于非正朔所加王者所
客也禮儀宜如諸侯王稱臣昧死再拜位次諸侯王下

宣紀望之傳並載○截傳作
截傳無舉國同心句義作化

蕭望之單于朝位議

單于非正朔所加故稱敵國宜待以不臣之禮位在諸
侯王上外夷稽首稱藩中國讓而不臣此則羈縻之誼
謙亨之福也書曰戎狄荒服言其來荒忽亡常如使凶
奴後嗣卒有烏窳鼠伏闕於朝享不為畔臣信讓行乎

蠻貉福祚流于亡窮萬世之長策也

宣帝客禮待單于詔

甘露二年

蓋稱五帝三王教化所不施不及以政今匈奴單于稱
非藩朝正朔朕之不逮德不能弘覆其以客禮待之令
單于位在諸侯王上贊謁稱臣而不名

教化紀作禮稱
非藩臣朝正月

王吉

字子陽瑯琊阜鄉人少好學明經宣帝時為
諫大夫謝病歸元帝初使徵年老道病卒

諫昌邑王疏

吉為昌邑王中尉王好游獵驅馳
國中動作亡節吉上疏諫之王猶

知敬禮吉
乃下令

臣聞古者師日行三十里吉行五十里詩云匪風發兮
匪車揭兮顧瞻周道中心慙兮說曰是非古之風也發
發者是非古之車也揭揭者蓋傷之也今者大王幸方
輿曾不半日而馳二百里百姓頗廢耕桑治道牽馬臣
愚以為民不可數變也昔召公述職當民事時舍于棠
下而聽斷焉是時人皆得其所後世思其仁恩至乎不伐
甘棠甘棠之詩是也大王不好書術而樂逸游馮式搏
銜馳騁不止口倦乎叱咤手苦於筆轡身勞乎車輿朝

則冒霧露晝則被塵埃夏則為大暑之所暴炙冬則為風寒之所匿薄數以奕脆之玉體犯勤勞之煩毒非所以全壽命之宗也又非所以進仁義之隆也夫廣廈之下細旃之上明師居前勸誦在後上論唐虞之際下及殷周之盛考仁聖之風習治國之道訢訢焉發憤忘食日新厥德其樂豈徒銜橛之間哉休則俯仰詘信以利形進退步趨以實下吸新吐故以練臍專意積精以適神於以養生豈不長哉大王誠留意如此則心有堯舜

之志體有喬松之壽美聲廣譽登而上聞則福祿其輶而社稷安矣皇帝仁聖至今思慕未怠於宮館園池弋獵之樂未有所幸大王宜夙夜念此以承聖意諸侯骨肉莫親大王大王於屬則子也於位則臣也一身而二任之責加焉恩愛行義纖介有不具者於以上聞非饗國之福也臣吉愚戇願大王察之

昌邑王賀下令

寡人造行不能無愆中尉甚忠數輔吾過使謁者千秋

賜中尉牛肉五百斤酒五石脯五束

戒昌邑王書

昭帝崩大將軍霍光迎賀吉即奏書戒之王即位二十餘日以淫亂

廢吉與郎中令龔遂以忠直數諫正得免死髡鉗為庶人

臣聞高宗諒闇三年不言今大王以喪事徵宜日夜哭泣悲哀而已慎無有所發且何獨喪事凡南面之君何言哉天不言四時行焉百物生焉願大王察之大將軍仁愛勇智忠信之德天下莫不聞事孝武皇帝二十餘年未嘗有過先帝棄羣臣屬以天下寄幼孤焉大將軍

抱持幼君襁褓之中布政施教海內晏然雖周公伊尹
亡以加也今帝崩亡嗣大將軍惟思可以奉宗廟者攀
援而立大王其仁厚豈有量哉臣願大王事之敬之政
事壹聽之大王垂拱南面而已願留意常以為念

上得失疏

吉為諫大夫時宣帝頗修武帝故事
宮室車服盛於昭帝時外戚許史王

氏貴寵上躬親政事任用能吏吉疏言
得失○疏言延儒修禮故禮樂志亦載

陛下躬聖質總萬方帝王圖籍日陳于前惟思世務將
興大平詔書每下民欣然若更生臣伏而思之可謂至

恩未可為本務也欲治之主不世出公卿幸得遭遇其
時言聽諫從然未有建萬世之長策舉明主於三代之
隆者也其務在於期會簿書斷獄聽訟而已此非太平
之基也臣聞聖王宣德流化必自近始朝廷不備難以
言治左右不正難以化遠民者弱而不可勝愚而不可
欺也聖主獨行於深宮得則天下稱誦之失則天下咸
言之行發於近必見於遠故謹選左右審擇所使左右
所以正身也所使所以宣德也詩云濟濟多士文王以

寧此其本也春秋所以大一統者六合同風九州共貫也今俗吏所以牧民者非有禮義科指可世世通行者也獨設刑法以守之其欲治者不知所繇以意穿鑿各取一切權譎自在故一變之後不可復修也是以百里不同風千里不同俗戶異政人殊服詐偽萌生刑罰亡極質樸日銷恩愛寢薄孔子曰安上治民莫善於禮非空言也王者未制禮之時引先王禮宜於今者而用之臣願陛下承天心發大業與公卿大臣延及儒生述舊

禮明王制毆一世之民躋之仁壽之域則俗何以不若
成康壽何以不若高宗竊見當世趨務不合於道者謹
條奏唯陛下財擇焉

條奏

其指如此上以其言迂闊不甚寵異也吉
謝病歸○傳云吉以為云云即前疏所為

者 條奏

夫婦人倫大綱夭壽之萌也世俗嫁娶太早未知為人
父母之道而有子是以教化不明而民多夭聘妻送女
亡節則貧人不及故不舉子又漢家列侯尚公主諸侯

則國人承翁主使男事女夫誦於婦逆陰陽之位故多
女亂古者衣服車馬貴賤有章以褒有德而別尊卑今
上下僭差人人自制是以貪財趨利不畏死亡周之所
以能致治刑措而不用者以其禁邪於冥冥絕惡於未
萌也

又言

舜湯不用三公九卿之世而舉臯陶伊尹不仁者遠今
使俗吏得任子弟率多驕驚不通古今至於積功治人

亡益於民此伐檀所為作也宜明選求賢除任子之令
外家及故人可厚以財不宜居位去角抵減樂府省尚
方明示天下以儉古者工不造瑯瑤商不通侈靡非工
商之獨賢政教使之然也民見儉則歸本本立而未成

張敞

字子高河東平陽人徙杜陵歷京兆冀州刺史太原太守元帝初徵為左馮翊以病卒

諫昌邑王書

敞擢為豫州刺史數上書有忠言昌邑王賀即位動作不由法度敞

上書諫賀廢敞以切諫顯

孝昭皇帝蚤崩無嗣大臣憂懼選賢聖承宗廟東迎之

日唯恐屬車之行遲今天子以盛年幼即位天下莫不拭目傾耳觀化聽風國輔大臣未褒而昌邑小輩先遷此過之大者也

言霍氏封事

宣帝初心憚廢王賀在昌邑徙敞自函谷都尉為山陽太守霍光薨

帝始親政事封光兄孫山雲皆為列侯子禹為大司馬頃之山雲以過歸第霍氏諸壻頗出補吏敞上封事上善其言

臣聞公子季友有功於魯大夫趙衰有功於晉大夫田完有功於齊皆疇其官邑延及子孫終後田氏篡齊趙

氏分晉季氏顓魯故仲尼作春秋述盛衰譏世卿最甚
迺者大將軍決大計安宗廟定天下功亦不細矣夫周
公七年耳而大將軍二十歲海內之命斷於掌握方其
隆時感動天地侵迫陰陽月朏日蝕晝冥宵光地大震
裂火生地中天文失度祿祥變怪不可勝記皆陰類盛
長臣下顓制之所生也朝臣宜有明言曰陛下褒寵故
大將軍以報功德足矣間者輔臣顓政貴戚太盛君臣
之分不明請罷霍氏三侯皆就第及衛將軍張安世宜

賜几杖歸休時存問召見以列侯為天子師明詔以恩
不聽群臣以義固爭而後許天下必以陛下為不忘功德
而朝臣為知禮霍氏世世無所患苦今朝廷不聞直聲
而令明詔自親其文非策之得者也今兩侯以出人情
不相遠以臣心度之大司馬及其枝屬必有畏懼之心
夫近臣自危非完計也臣敞願於廣朝白發其端直守
遠郡其路無由夫心之精微口不能言也言之微眇書
不能文也故伊尹五就桀五就湯蕭相國薦淮陰累歲

乃得通况乎千里之外因書文諭事指哉唯陛下省察

自請治盜賊書

勃海膠東盜賊並起敝時為山陽太守自請治之徵拜膠東相

設購捕斬國中稱平

臣聞忠孝之道退家則盡心於親進官則竭力於君夫小國中君猶有奮不顧身之臣况於明天子乎今陛下遊意於太平勞精於政事疊疊不舍晝夜羣臣有司宜各竭力致身山陽郡戶九萬三千口五十萬以上訖計盜賊未得者七十七人它課諸事亦略如此臣敝愚駑

既無以佐思慮久處閒郡身逸樂而忘國事非忠孝之節也伏聞膠東渤海左右郡歲數不登盜賊竝起至攻官寺篡囚徒搜市朝刦列侯吏失綱紀姦軌不禁臣敞不敢愛身避死唯明詔之所處願盡力摧挫其暴虐存撫其孤弱事即有業所至郡條奏其所由廢及所以興之狀

諫膠東太后書

敞為膠東相王太后數出游獵奏書諫乃止

臣聞秦皇好淫聲葉陽后為不聽鄭衛之樂楚嚴好田

獵樊姬為之不食鳥獸之肉口非惡旨甘耳非憎絲竹也所以抑心意絕者欲者將以率二君而全宗祀也禮君母出門則乘輜駟下堂則從傅母進退則鳴玉佩內飾則結綢繆此言尊貴所以自斂制不從恣之義也今太后資質淑美慈愛寬仁諸侯莫不聞而少以田獵縱欲為名於以上聞亦未宜也唯觀覽於往古全行乎來今令后姬得有所法則下臣有所稱誦臣啟幸甚

漢書
○葉

陽漢紀作華陽樂作曲楚嚴作楚莊憎作惡將以作將欲結上有何字尊貴作至尊至貴縱恣作恣縱縱欲作

盜欲於以作以
此下臣作臣下

論黃霸請飭長吏奏

五鳳初黃霸為丞相功名損於治郡時敞舍鵬雀

集其府霸為神雀議欲以聞敞奏霸請明飭長吏守丞天子嘉納召上計吏臨飭如敞指

竊見丞相請與中二千石博士雜問郡國上計長吏守丞為民興利除害成大化條其對有耕者讓畔男女異路道不拾遺及舉孝子弟弟貞婦者為一輩先上殿舉而不知其人數者次之不為條教者在後叩頭謝丞相雖口不言而心欲其為之也長吏守丞對時臣敞舍有

鵲雀飛止丞相府屋上丞相以下見者數百人邊吏多
知鵲雀者問之皆陽不知丞相圖議上奏曰臣聞上計
長吏守丞以興化條皇天報下神雀後知從臣敞舍來
乃止郡國吏竊笑丞相仁厚有知略微信奇怪也昔汲
黯為淮陽守辭去之官謂大行李息曰御史大夫張湯
懷詐阿意以傾朝廷公不蚤白與俱受戮矣息畏湯終
不敢言後湯誅敗上聞黯與息語乃抵息罪而秩黯諸
侯相取其思竭忠也臣敞非敢毀丞相也誠恐群臣莫

白而長吏守丞畏丞相指歸舍法令各為私教務相增
加澆淳散樸並行偽貌有名無實傾搖解怠甚者為妖
假令京師先行讓畔異路道不拾遺其實亡益廉貪貞
淫之行而以偽先天下固未可也即諸侯先行之偽聲
軼於京師非細事也漢家承敝通變造起律令即以勸
善禁姦條貫詳備不可復加宜令貴臣明飭長吏守丞
歸告二千石舉三老孝弟力田孝廉廉吏務得其人郡
事皆以義法令檢式毋得擅為條教敢挾詐偽以奸名

譽者必先受戮以正明好惡

入穀贖罪書

西羌反上遣後將軍征之敞為京兆尹上書以師出不時西北田事

頗廢令民得入穀贖罪左馮翊蕭望之與少府李彊議以為開利路傷成化上令兩府難問敞答望之彊復對時丞相御史大夫丙吉以為羌虜且破轉輸畧足乃遂不施敞議

國兵在外軍以夏發隴西以北安定以西吏民並給轉輸田事頗廢素無餘積雖羌虜已破來春民食必乏窮辟之處買無所得縣官穀度不足以振之願令諸有臯非盜受財殺人及犯法不得赦者皆得以差入穀此八

郡贖罪務益致穀以預備百姓之急

蕭望之李彊難入粟贖罪議

民函陰陽之氣有仁義欲利之心在教化之所助雖堯在上不能去民欲利之心而能令其欲利不勝其好義也雖桀在上不能去民好義之心而能令其好義不勝其欲利也故堯桀之分在於義利而已道民不可不慎也今欲令民量粟以贖罪如此則富者得生貧者獨死是貧富異刑而法不壹也人情貧窮父兄囚執聞出財

得以生活為人子弟者將不顧死亡之患敗亂之行以
赴財利求救親戚一人得生十人以喪如此伯夷之行
壞公綽之名滅政教壹傾雖有周召之佐恐不能復古
者藏於民不足則取有餘則予詩曰爰及矜人哀此鰥
寡上惠下也又曰雨我公田遂及我私下急上也今有
西邊之役民失作業雖戶賦口歛以贍其困乏古之通
義百姓莫以為非以死救生恐未可也陛下布德施教
教化既成堯舜亡以加也今議開利路以傷既成之化

臣竊痛之

入粟贖罪再議

少府左馮翊所言常人之所守耳昔先帝征四夷兵行三十餘年百姓猶不加賦而軍用給今羗虜一隅小夷跳梁於山谷間漢但令臯人出財減臯以誅之其名賢於煩擾良民橫興賦歛也又諸盜及殺人犯不道者百姓所疾苦也皆不得贖首匿見知縱所不當得為之屬議者或頗言其法可蠲除今因此令贖其便明甚何化

之所亂甫刑之罰小過赦薄罪贖有金選之品所從來
久矣何賊之所生故備早衣二十餘年嘗聞罪人贖矣
未聞盜賊起也竊憐涼州被寇方秋饒時民尚有饑乏
病死於道路况至來春將大困乎不早慮所以振救之
策而引常經以難恐後為重責常人可與守經未可與
權也故幸得備列卿以輔兩府為職不敢不盡愚

蕭望之李彊難入粟贖罪再議

先帝聖德賢良在位作憲垂法為無窮之規永惟邊竟

之不贍故金布令甲曰邊郡數被兵離饑寒天絕天年
父子相失令天下共給其費固為軍旅卒暴之事也聞
天漢四年常使死罪人入五十萬錢減死罪一等豪彊
吏民請奪假貲至為盜賊以贖罪其後姦邪橫暴群盜
竝起至攻城邑殺郡守充滿山谷吏不能禁明詔遣繡
衣使者以興兵擊之誅者過半然後衰止愚以為此使
死罪贖之敗也故曰不便

諫信方士疏

宣帝修武帝故時事敬禮齋祠光祿大夫劉更生獻淮南枕中苑秘

方令尚方鑄作不成坐論
敬疏諫後尚方待詔皆罷

願明主時忘車馬之好斥遠方士之虛語游心帝王之
術太平庶幾可興也

上寶鼎議

美陽得鼎獻之議者以為宜薦見宗
廟如元鼎時故事敬好古文宇按鼎

銘勒而上議制
曰京兆尹議定

臣聞周祖始乎后稷后稷封于簠公劉發迹於豳大王
建國於邠梁文武興於豐鎬由此言之則邠梁豐鎬之
間周舊居也固宜有宗廟壇場祭祀之職今鼎出於邠

東中有刻書曰王命尸臣官此栒邑賜爾旂鸞黼黻珎
戈尸臣拜手稽首曰敢對揚天子丕顯休命臣愚不足
以述古文竊以傳記言之此鼎殆周之所以褒賜大臣
大臣子孫刻銘其先功臧之於宮廟也昔寶鼎之出於
汾隄也河東太守以聞詔曰朕巡祭后土祈為百姓蒙
豐年今穀噍未報鼎焉為出哉博問耆老意舊臧與誠
欲考得事實也有司驗隄上非舊臧處鼎大八尺一寸
高三尺六寸殊異於衆鼎今此鼎細小又有款識不宜

薦見于宗廟

告絮舜教

敵為京兆尹坐楊惲黨劾奏不下使賊捕掾絮舜有所案驗舜以敵劾奏

當免五日京兆耳安能復案事敵收舜繫獄使主簿持教告舜乃弃舜市舜家載尸并編

敵教自言免為庶人數月京師枹鼓數起冀州部中有大賊復召敵敵詣公車上書拜冀

州刺史

五日京兆竟何如冬月已盡延命乎

詣公車上書

臣前幸得備位列卿待罪京兆坐殺賊捕掾絮舜本

臣敞素所厚吏數蒙恩貸以臣有章劾當免受記考事
便歸卧家謂臣五日京兆背恩忘義傷化薄俗臣竊以
舜無狀枉法以誅之臣敞賊殺無辜鞠獄故不直雖伏
明法死無所恨

與朱邑書

邑字仲卿廬江舒人少為舒桐鄉嗇夫廡平不苛為大司農卒命葬桐鄉

邑為北海太守治行第一入為大司農是時
敞為膠東相與邑書邑感敞言貢薦賢士大

夫多得
其力

明主游心太古廣延茂士此誠忠臣竭思之時也直敞

遠守劇郡馭於繩墨勾臆約結固亡奇也雖有亦安所
施足下以清明之德掌周稷之官猶饑者甘糟糠穰歲
餘粢肉何則有亡之勢異也昔陳平雖賢須魏倩而後
進韓信雖奇賴蕭公而後信故士各達其時之英俊若
必伊尹呂望而後薦之則此人不因足下而進矣

並漢書○

約結選註
作糾結

答朱登書

登為東海相遺啟蟹
醬啟答○一作蟹

遽伯玉受孔子之賜必以及其鄉人敬謹分斯貺于三
老尊行者曷敢獨享之

子一作氏必以及其鄉人作必及鄉黨

與某公書

夫蒼龍非不神不能白日升天飄風雖疾不以霖雨不
能揚塵故蒼蠅之飛不過十步自托騏驎之旌乃騰千
里之路然無損於騏驎得使蒼蠅絕羣也

並張敞集○北堂書鈔載

前段藝文類聚載後段○旌一作尾一作髮
廣絕交論附騏驎之旌端指歸鴻于碣石

諭嚴延年書

延年為河南太守威震旁郡號曰屠伯敞為京兆尹素與延年善敞治雖嚴然尚頗有縱舍聞延年用刑刻急乃以書諭之延年報書自矜伐其能終不衰止府丞議言延年罪名十事坐怨望棄市

昔韓盧之取菟也上觀下獲不甚多殺願次卿少緩誅

罰思行此術

嚴延年

字次卿東海下邳人少學法律為郡吏歷河南太守

報張敞書

河南天下喉咽二周餘斃芳盛苗穢何可不鉏也

漢書

徐福

上言霍氏疏

初霍氏奢侈茂陵徐生曰霍氏必亡夫奢則不遜不遜必侮上侮上

者逆道也在人之右衆必害之霍氏秉權日久害之者多而又行以逆道不亡何待乃上疏言之書三上輒報聞其後霍氏誅滅而告霍氏者皆封人為徐生上書上賜福帛十匹

後以為郎

霍氏泰盛陛下即愛厚之宜以時抑制無使至亡

人為徐生上書

臣聞客有過主人者見其竈直突傍有積薪客謂主人

更為曲突遠徙其薪不者且有火患主人嘿然不應俄而家果失火鄰里共救之幸而得息於是殺牛置酒謝其鄰人灼爛者在於上行餘各以功次坐而不錄言曲突者人謂主人曰鄉使聽客之言不費牛酒終亡火患今論功而請賓曲突徙薪亡恩澤焦頭爛額為上客耶主人乃寤而請之今茂陵徐福數上書言霍氏且有變宜防絕之鄉使福說得行則國亡裂土出爵之費臣亡逆亂誅滅之敗往事既已而福獨不蒙其功唯陛下察

之貴徙薪曲突之策使居焦駿灼爛之右

路溫舒

字長君鉅鹿東里人通律令為決曹掾歷臨淮太守

尚德緩刑書

元鳳中廷尉解光以治詔獄請溫舒署奏曹掾守廷尉史宣帝初立

溫舒上書言宜尚德緩刑上善其言為置廷平

臣聞齊有無知之禍而桓公以興晉有嬖姬之難而文公用伯近世趙王不終諸呂作亂而孝文為太宗繇是觀之禍亂之作將以開聖人也故桓文扶微興壞尊文武之業澤加百姓功潤諸侯雖不及三王天下歸仁焉

文帝永思至惠以承天心崇仁義省刑罰通關梁一遠
近敬賢如大賓愛民如赤子內恕情之所安而施之於
海內是以囹圄空虛天下太平大繼變化之後必有異
舊之恩此賢聖所以昭天命也往者昭帝卽世而無嗣
大臣憂戚焦心合謀皆以昌邑尊親援而立之然天不
授命淫亂其心遂以自亡深察禍變之故迺皇天之所
以開至聖也故大將軍受命武帝股肱漢國披肝膽決
大計黜亡義立有德輔天而行然後宗廟以安天下咸

寧臣聞春秋正即位大一統而慎始也陛下初登至尊
與天合符宜改前世之失正始受命之統滌煩文除民
疾存亡繼絕以應天意臣聞秦有十失其一尚存治獄
之吏是也秦之時羞文學好武勇賤仁義之士貴治獄
之吏正言者謂之誹謗過過者謂之妖言故盛服先生
不用於世忠良切言皆鬱於胸譽諛之聲日滿於耳虛
美薰心實禍蔽塞此乃秦之所以亡天下也方今天下
賴陛下恩厚亡金革之危饑寒之患父子夫妻戮力安

家然太平未洽者獄亂之也夫獄者天下之大命也死者不可復生鬪者不可復屬書曰與其殺不辜寧失不經今治獄吏則不然上下相毆以刻為明深者獲公名平者多後患故治獄之吏皆欲人死非憎人也自安之道在人之死是以死人之血流離於市被刑之徒比肩而立大辟之計歲以萬數此仁聖之所以傷也太平之未洽凡以此也夫人情安則樂生痛則思死捶楚之下何求而不得故囚人不勝痛則飾辭以視之吏治者利

其然則指道以明之上奏畏卻則鍛鍊而周内之蓋奏
當之成雖咎繇聽之猶以為死有餘辜何則成練者衆
文致之罪明也是以獄吏專為深刻殘賊而亡極媮為
一切不顧國患此世之大賊也故俗語曰畫地為獄議
不入刻木為吏期不對此皆疾吏之風悲痛之辭也故
天下之患莫深於獄敗法亂正離親塞道莫甚乎治獄
之吏此所謂一尚存者也臣聞烏鳶之卵不毀而後鳳
皇集誹謗之罪不誅而後良言進故古人有言山藪藏

疾川澤納汙瑾瑜匿惡國君含詬唯陛下除誹謗以招
切言開天下之口廣箴諫之路掃亡秦之失尊文武之
德省法制寬刑罰以廢治獄則太平之風可興於世永
履和樂與天亡極天下幸甚

並漢書

西漢文紀卷十二

欽定四庫全書

西漢文紀卷十三

明梅鼎祚編

辛武賢

狄道人為酒泉太守拜破羌將軍以趙充國言兵事罷歸

請擊罕開奏

初光祿大夫義渠安國使行諸羌時先零罕開解仇作約為漢邊患

安國召先零豪斬之縱兵擊其種人於是諸羌背畔犯塞攻城邑安國以騎都尉屯備羌為虜所擊充國為後將軍年七十餘自請將馳至金城計欲以威信招降罕開解散虜謀虜數挑戰充國堅守時上已發諸郡兵與張掖酒泉屯郡者六萬人酒泉太守武賢上奏請分兵擊罕開上下其書充國令與校尉以下博議充國與長史董通年議奏欲先行先

零之誅公卿議者咸以為先零兵盛而負罕
開之助不先破罕開則先零未可圖也上乃
拜侍中許延壽為彊弩將軍武賢為破羌將
軍璽書嘉納其冊而敕讓充國充國以為將
任兵在外便宜有守以安國家乃上書謝罪
因陳兵利害璽書報從充國計充國引兵擊
先零破之

郡兵皆屯備南山北邊空虛勢不可久或曰至秋冬乃
進兵此虜在竟外之冊今虜朝夕為寇土地寒苦漢馬
不能冬屯兵在武威張掖酒泉萬騎以上皆多羸瘦可
益馬食以七月上旬齎三十日糧分兵竝出張掖酒泉

合擊罕开在鮮水上者虜以畜產為命今皆離散兵即分出雖不能盡誅亶奪其畜產虜其妻子復引兵還冬復擊之大兵仍出虜必震壞

趙充國

字翁孫隴西上邽人徙金城令居歷擢後將軍衛尉初以定冊立宣帝封營平侯

駁辛武賢議羌事奏

武賢欲輕引萬騎分為兩道出張掖回遠千里以一馬自佗負三十日食為米二斛四斗麥八斛又有衣裝兵器難以追逐勤勞而至虜必商軍進退稍引去逐水中

入山林隨而深入虜即據前險守後阨以絕糧道必有傷危之憂為夷狄笑千載不可復而武賢以為可奪其畜產虜其妻子此殆空言非至計也又武威縣張掖日勒皆當北塞有通谷水中臣恐匈奴與羌有謀且欲大入幸能要杜張掖酒泉以絕西域其郡兵尤不可發先零首為畔逆它種剗略故臣愚冊欲捐罕开闇昧之過隱而勿章先行先零之誅以震動之宜悔過反善因赦其罪選擇良吏知其俗者拊循和輯此全師保勝安邊

之冊

宣帝敕讓趙充國書

皇帝問後將軍甚苦暴露將軍計欲至正月乃擊罕羌
羌人當獲麥已遠其妻子精兵萬人欲為酒泉燉煌寇
邊兵少民守保不得田作今張掖以東粟石百餘萬橐
東數十轉輸並起百姓煩擾將軍將萬餘之衆不早及
秋共水草之利爭其畜食欲至冬虜皆當畜食多藏匿
山中依險阻將軍士寒手足皸痂寧有利哉將軍不念

中國之費欲以歲數而勝微將軍誰不樂此者今詔破
羌將軍武賢將兵六千一百人敦煌太守快將二千人
長水校尉富昌酒泉侯奉世將婁月氏兵四千人亡慮
萬二千人齋三十日食以七月二十二日擊罕羌入鮮
水北句廉上去酒泉八百里去將軍可千二百里將軍
其引兵便道西並進雖不相及使虜聞東方北方兵並
來分散其心意離其黨與雖不能殄滅當有瓦解者已
詔中郎將卬將胡越狄飛射士步兵二校益將軍兵今

五星出東方中國大利蠻夷大敗太白出高用兵深入
敢戰者吉弗敢戰者凶將軍急裝因天時誅不義萬下
必全勿復有疑

陳兵利害疏

克國既破先零罕羌聞之喜曰漢果不擊我矣豪靡忘使人來言願

得還復故地後罕开竟不煩兵而下其秋克國病上賜書

臣竊見騎都尉安國前幸賜書擇羌人可使使罕諭告
以大軍當至漢不誅罕以解其謀恩澤甚厚非臣下所
能及臣獨私美陛下盛德至計亡已故遣开豪雕庫宣

天子至德罕开之屬皆聞知明詔今先零羌楊玉此羌之首帥名王將騎四千及煎鞏騎五千阻石山木候便為寇罕羌未有所犯今置先零先擊罕釋有罪誅亡辜起壹難就兩害誠非陛下本計也臣聞兵法攻不足者守有餘又曰善戰者致人不致於人今罕羌欲為敦煌酒泉寇宜飭兵馬練戰士以須其至坐得致敵之術以逸擊勞取勝之道也今恐二郡兵少不足以守而發之行政釋致虜之術而從為虜所致之道臣愚以為不便

先零羌虜欲為背畔故與罕开解仇結約然其私心不能忘恐漢兵至而罕开背之也臣愚以為其計常欲先赴罕开之急以堅其約先擊罕羌先零必助之今虜馬肥糧食方饒擊之恐不能傷害適使先零得施德於罕羌堅其約合其黨虜交堅黨合精兵二萬餘人迫脅諸小種附著者稍衆莫須之屬不輕得離也如是虜兵寢多誅之用力數倍臣恐國家憂累繇十年數不二三歲而已臣得蒙天子厚恩父子俱為顯列臣位至上卿爵

為列侯犬馬之齒七十六為明詔填溝壑死骨不朽亡
所顧念獨思惟兵利害至孰悉也於臣之計先誅先零
已則罕开之屬不煩兵而服矣先零已誅而罕开不服
涉正月擊之得利之理又其時也以今進兵誠不見其
利唯陛下裁察

宣帝賜趙充國書

制詔後將軍聞苦腳脰寒泄將軍年老加疾一朝之變
不可諱朕甚憂之今詔破羌將軍詣屯所為將軍副急

因天時大利吏士銳氣以十二月擊先零羌即疾劇留屯毋行獨遣破羌彊弩將軍

上屯田奏

充國擊先零時先零降者萬餘人充國度其必壞欲罷騎兵留屯田遂上

其狀上報之

臣聞兵者所以明德除害也故舉得於外則福生於內不可不慎臣所將吏士馬牛食月用糧穀十九萬九千六百三十斛鹽千六百九十三斛芡藁二十五萬二千八十六石難久不解繇役不息又恐它夷卒有不虞之

變相因並起為明主憂誠非素定廟勝之冊且羌虜易以計破難用兵碎也故臣愚以為擊之不便計度臨羌東至浩疊羌虜故田及公田民所未墾可二千頃以上其間郵亭多壞敗者臣前部士入山伐材木大小六萬餘枚皆在水次願罷騎兵留弛刑應募及淮陽汝南步兵與吏士私從者合凡萬二百八十一人用穀月二萬七千三百六十三斛鹽三百八斛分屯要害處永解漕下繕鄉亭浚溝渠治隍陁以西道橋七十所令可至鮮

水左右田事出賦人二十晦至四月草生發郡騎及屬國胡騎伉健各千倅馬什二就草為田者遊兵以充入金城郡益積畜省大費今大司農所轉穀至者足支萬人一歲食謹上田處及器用簿唯陛下裁許

宣帝報趙充國屯田書

皇帝問後將軍言欲罷騎兵萬人留田即如將軍之計虜當何時伏誅兵當何時得決孰計其便復奏

再上屯田奏

充國得上報復奏留屯田得十二便出兵失十二利詔復報之

臣聞帝王之兵以全取勝是以貴謀而賤戰戰而百勝
非善之善者也故先為不可勝以待敵之可勝蠻夷習
俗雖殊於禮義之國然其欲避害就利愛親戚畏死亡
一也今虜亡其美地薦草愁於寄託遠遯骨肉離心人
有畔志而明主般師罷兵萬人留田順天時因地利以
待可勝之虜雖未即伏辜兵決可朞月而望羌虜瓦解
前後降者萬七百餘人及受言去者凡七十輩此坐支
解羌虜之具也臣謹條不出兵留田便宜十二事步兵

九校吏士萬人留屯以為武備因田致穀威德竝行一也又因排折羌虜令不得歸肥饒之墜貧破其衆以成羌虜相畔之漸二也居民得竝田作不失農業三也軍馬一月之食度支田士一歲罷騎兵以省大費四也至春省甲士卒循河湟漕穀至臨羌以眎羌虜揚威武傳世折衝之具五也以閒暇時下所伐材繕治郵亭充入金城六也兵出乘危徼幸不出令反畔之虜竄於風寒之地離霜露疾疫瘰墮之患坐得必勝之道七也亡經

阻遠追死傷之害八也內不損威武之重外不令虜得乘間之執九也又亡驚動河南大开小开使生它變之憂十也治隍陘中道橋令可至鮮水以制西域信威千里從枕席上過師十一也大費既省繇役豫息以戒不虞十二也留屯田得十二便出兵失十二利臣充國材下犬馬齒衰不識長冊唯明詔博詳公卿議臣採擇

宣帝復報趙充國屯田書

皇帝問後將軍言十二便聞之虜雖未伏誅兵決可期

月而望期月而望者謂今冬耶謂何時也將軍獨不計
虜聞兵頗罷且丁壯相聚攻擾田者及道上屯兵復殺
略人民將何以止之又大开小开前言曰我告漢軍先
零所在兵不往擊久留得亡效五年時不分別人而并
擊我其意常恐今兵不出得亡變生與先零為一將軍
孰計復奏

三上屯田奏

充國得上前報復奏虜勢自壞今
留屯田以逸待勞兵之大利詔報

聽之上以破羌彊弩將軍數言當擊又用充
國屯田處離散恐虜犯之於是兩從其計兩

將軍與充國子中郎將卬出擊多所降斬而充國所降復得五千餘人詔罷兵獨充國留屯田明年充國因請罷屯田奏可振旅而還辛武賢歸酒泉太守充國復為後將軍衛尉其秋羌若零等降置金城屬國以處降羌初充國奏每上輒下公卿議是充國計者什三中什五最後什八丞相魏相曰後將軍數畫軍冊其言常是臣任其計可必用也有詔詰前言不便者皆頓首服

臣聞兵以計為本故多算勝少算先零羌精兵今餘不過七八千人失地遠客分散飢凍罕开莫須又頗暴略其羸弱畜產畔還者不絕皆聞天子明令相捕斬之賞

臣愚以為虜破壞可日月冀遠在來春故曰兵決可期
月而望竊見北邊自燉煌至遼東萬一千五百餘里乘
塞列隧有吏卒數千人虜數大衆攻之而不能害今留
步士萬人屯田地勢平易多高山遠望之便部曲相保
為塹壘木樵校聯不絕便兵弩飭鬪具燒火幸通勢及
并力以逸待勞兵之利者也臣愚以為屯田內有亡費
之利外有守禦之備騎兵雖罷虜見萬人留田為必禽
之具其土崩歸德宜不久矣從今盡三月虜馬羸瘦必

不敢捐其妻子於它種中遠涉河山而來為寇又見屯田之士精兵萬人終不敢復將其累重還歸故地是臣之愚計所以度虜且必瓦解其處不戰而自破之冊也至於虜小寇盜時殺人民其原未可卒禁臣聞戰不必勝不苟接刃攻不必取不苟勞衆誠令兵出雖不能滅先零豈能令虜絕不為小寇則出兵可也即今同是而釋坐勝之道從乘危之勢往終不見利空內自罷敝貶重而自損非所以視蠻夷也大兵一出還不可復留

惶中亦未可空如是繇役復發也且匈奴不可不備烏
桓不可不憂今久轉運煩費傾我不虞之用以澹一隅
臣愚以為不便校尉臨衆幸得承威德奉厚幣拊循衆羌
諭以明詔宜皆鄉風雖其前辭嘗曰得亡效五年宜亡
它心不足以故出兵臣竊自惟念奉詔出塞引軍遠擊
窮天子之精兵散車甲於山野雖亡尺寸之功媮得避
憊之便而亡後咎餘責此人臣不忠之利非明主社稷
之福也臣幸得奮精兵討不義久留天誅罪當萬死陛

下寬仁未忍加誅令臣數得孰計愚臣伏計孰甚不敢避斧鉞之誅昧死陳愚唯陛下省察

宣帝報聽趙充國書

皇帝問後將軍上書言羌虜可勝之道今聽將軍將軍計善其上留屯田及當罷者人馬數將軍強食慎兵事自愛

請罷屯兵奏

羌本可五萬人軍凡斬首七千六百級降者三萬一千

二百人溺河湟飢餓死者五六千人定計遺脫與煎鞏黃羗俱亡者不過四千人羌靡忘等自詭必得請罷屯

兵

王生

予蓋寬饒書

寬饒為司隸校尉同列後進或至九卿自以行清能高有益於國而

為凡庸所越愈失意不快數上疏諫諍太子庶子王生高寬饒節而非其如此予之書寬饒不內其言是時宣帝方用刑法信任中尚書宦官寬饒奏對事坐怨謗下吏自劉非關下○班固贊曰蓋寬饒為司臣正色立朝雖詩所謂國之司直無以加也若采王生之言

以終其身斯近
古之賢臣矣

明主知君絜白公正不畏彊禦故命君以司察之位擅
君以奉使之權尊官厚祿已施於君矣君宜夙夜惟思
當世之務奉法宣化憂勞天下雖日有益月有功猶未
足以稱職而報恩也自古之治三王之術各有制度今
君不務循職而已迺欲以太古久遠之事匡拂天子數
進不用難聽之語以摩切左右非所以揚令名全壽命
者也方今用事之人皆明習法令言足以飾君之辭文

足以成君之過君不惟遽氏之高蹤而慕子胥之未行
用不資之軀臨不測之險竊為君痛之夫君子直而不
撓曲而不詘大雅云既明且哲以保其身狂夫之言聖
人擇焉唯裁省覽並漢書

蓋寬饒

字次公魏郡人為諫大夫歷太中大夫多所稱舉擢司隸校尉

奏宣帝封事

帝下其書時執金吾議以指意欲求譚大逆不道鄭昌書訟之

方今聖道寢廢儒術不行以刑餘為周召以法律為詩

書

又引韓氏易傳言五帝官天下三王家天下家以傳子官以傳賢若四時之運功成者去不得其人則不

欽定四庫全書

西漢文紀

三

居其位

鄭昌

字次卿泰山剛人明經通法律政事為太原涿郡太守

訟蓋寬饒書

昌為諫大夫愍傷寬饒忠直憂國而為文吏所詆挫上書訟之不聽

臣聞山有猛獸藜藿為之不采國有忠臣姦邪為之不
起司隸校尉寬饒居不求安食不求飽進有憂國之心
退有死節之義上無許史之屬下無金張之託職在司
察直道而行多仇少與上書陳國事有司劾以大辟臣
幸得從大夫之後官以諫為名不敢不言

請刪定律令疏

宣帝常幸宣室齋居決事獄刑雖號為平昌以置廷平不如刪

定律令以使民知所避上疏

聖王置諫爭之臣者非以崇德防逸豫之生也立法明刑者非以為治救衰亂之起也今明主躬垂明聽雖不置廷平獄將自正若開後嗣不若刪定律令律令一定愚民知所避姦吏無所弄矣今不正其本而置廷平以理其末也政衰聽怠則廷平將招權而為亂首矣

戴長樂



告楊惲罪書

惲為中郎將廉絜無私然伐其行治又性刻害與太僕戴長樂相失

長樂宣帝在民間時相知及即位拔擢親近為太僕嘗使行事肆宗廟還謂掾吏曰我受詔副帝肆稅侯御人告長樂非所宜言長樂疑惲教人上書告惲罪事下廷尉廷尉于定國考問左驗明白上奏詔皆免為庶人後竟被誅

高昌侯車犇入北掖門惲語富平侯張延壽曰聞前有犇車抵殿門門闕折馬死而昭帝崩今復如此天時非人力也左馮翊韓延壽有罪下獄惲上書訟延壽郎中邱常謂惲曰聞君侯訟韓馮翊當得活乎惲曰事何容

易脛脛者未必全也我不能自保真人所謂鼠不容穴
銜竄數者也又中書謁者令宣持單于使者語視諸將
軍中朝二千石惲曰冒頓單于得漢美食好物謂之殍
惡單于不來明甚惲上觀西閣上畫人指桀紂畫謂樂
昌侯王武曰天子過此一二問其過可以得師矣畫人
有堯舜禹湯不稱而舉桀紂惲聞匈奴降者道單于見
殺惲曰得不肖君大臣為畫善計不用自令身無處所
若秦時但任小臣誅殺忠良竟以滅亡令親任大臣即

至今耳古與今如一邱之貉惲妄引亡國以誹謗當世
無人臣禮又語長樂曰正月以來天陰不雨此春秋所
記夏侯君所言行必不至河東矣以主上為戲語尤悖
逆絕理

于定國

字曼倩東海郿人仕廷尉持法平十八
歲遷御史大夫為丞相坐不稱自劾罷

楊惲罪奏

惲不服罪而召戶將尊欲令戒飭富平侯延壽曰太僕
定有死罪數年朝暮人也惲幸與富平侯婚姻今獨二

人坐語侯言時不聞惲語自與太僕相觸也尊曰不可
惲怒持大刀曰蒙富平侯力得族罪毋泄惲語令太僕
聞之亂餘事惲幸得列九卿諸吏宿衛近臣上所信任
與聞政事不竭忠愛盡臣子義而妄怨望稱引為妖惡
言大逆不道請逮捕治

楊惲

字子幼華陰人丞相敞之子以忠
任為郎發霍氏反謀封平通侯

報孫會宗書

惲坐怨望免為庶人既失爵位家
居治產業起室宅以財自娛歲餘

其友人安定太守西河孫會宗知略士也與
惲書諫戒之為言大臣廢道當闔門惶懼為

可憐之意不當治產業通賓客有稱譽憚宰相子少顯朝廷一朝晦昧語言見廢內懷不服報會宗書會日食駟馬猥佐成上書告憚驕奢不悔過日食之咎此人所致章下廷尉按驗得所與會宗書宣帝見而惡之當大逆要斬妻子徙酒泉郡會宗等皆免官

憚材朽行穢文質無所底幸賴先人餘業得備宿衛遭遇時變以獲爵位終非其任卒與禍會足下哀其愚蒙賜書教督以所不及殷勤甚厚然竊恨足下不深惟其終始而猥隨俗之毀譽也言鄙陋之愚心若逆指而文過默而息乎恐違孔氏各言爾志之義故敢略陳其愚

惟君子察焉惓家方隆盛時乘朱輪者十人位在列卿
爵為通侯總領從官與聞政事曾不能以此時有所建
明以宣德化又不能與羣僚同心并力陪輔朝廷之遺
忘已負竊位素餐之責久矣懷祿貪執不能自退遭遇
變故橫被口語身幽北闕妻子滿獄當此之時自以夷
滅不足以塞責豈意得金首領復奉先人之邱墓乎伏
惟聖主之恩不可勝量君子游道樂以忘憂小人全軀
說以忘罪竊自思念過已大矣行已虧矣長為農夫以

沒世矣是故身率妻子戮力耕桑灌園治產以給公上不意當復用此為譏議也夫人情所不能止者聖人弗禁故君父至尊親送其終也有時而既臣之得罪已三年矣田家作苦歲時伏臘烹羊炰羔斗酒自勞家本秦也能為秦聲婦趙女也雅善鼓瑟奴婢歌者數人酒後耳熱仰天拊缶而呼烏烏其詩曰田彼南山蕪穢不治種一頃豆落而為箕人生行樂耳須富貴何時是日也拂衣而起奮襖低卬頓足起舞誠荒淫亡度不知其不

可也。憚幸有餘祿，方糴賤販，貴逐什一之利。此賈豎之事，汙辱之處。憚親行之下流之人，衆毀所歸，不寒而栗。雖雅知憚者，猶隨風而靡。尚何稱譽之有？董生不云乎？明明求仁義，常恐不能化民者，卿大夫意也。明明求財利，常恐困乏者，庶人之事也。故道不同，不相為謀。今子尚安得以卿大夫之制而責僕哉？夫西河魏土，文侯所興，有段干木、田子方之遺風，凜然皆有節概，知去就之分。頃者足下離舊土，臨安定，安定山谷之間，昆戎舊壤。

子弟貪鄙豈習俗之移人哉於今迺睹子之志矣方當

盛漢之隆願勉旃毋多談

洪書曰真德秀曰憚文氣豪蕩似史遷然其詞涉怨望

耿壽昌

請糴奏

宣帝時歲數豐穰穀至石五錢農人少利五鳳中壽昌以善為算能商功利得

幸於上奏請糴三輔供京師又白增海租三倍皆從其計蕭望之為御史大夫奏駁之不聽

故事歲漕關東穀四百萬斛以給京師用卒六萬人宜
糴三輔弘農河東上黨太原郡穀足供京師可以省關

東漕卒過半

蕭望之駁耿壽昌奏

故御史屬徐宮家在東萊言往年加海租魚不出長老
皆言武帝時縣官嘗自漁海魚不出後復予民魚迺出
夫陰陽之感物類相應萬事盡然今壽昌欲近糴漕關
內之穀築倉治船費直二萬萬餘有動衆之功恐生旱
氣民被其災壽昌習于商功分銖之事其深計遠慮誠
未足任宜且如故

冀州刺史林

史失姓

劾代王年奏

年嗣父項王地節中冀州刺史林奏年淫亂廢為庶人徙房陵

年為太子時與女弟則私通及年立為王後則懷年子其壻使勿舉則曰自來殺之壻怒曰為王生子自令王家養之則送兒頃太后所相聞知禁止則令不得入宮年使從李父往來送迎則連年不絕

大鴻臚禹

平干王元不宜立嗣奏

趙王彭祖為景帝子武帝以親親故復封其小

子偃為平干王子元嗣五鳳
二年薨大鴻臚禹奏可國除

元前以刀賊殺奴婢子男殺謁者為刺史所舉奏罪名
明白病先令令能為樂奴婢從死迫脅自殺者凡十六
人暴虐不道故春秋之義誅君之子不宜立元雖未伏
誅不宜立嗣

王褒

字子淵蜀人宣帝有博異之好徵令待詔擢
諫大夫使祠金馬碧雞于益州道病死上閔

惜之

四子講德論

褒為益州刺史王褒作中和樂職
宣布之詩又為四子講德論

因奏言褒有軼才宣帝乃徵褒詔為聖主得
賢臣頌其意是時上頗好神仙故褒對及之
上令褒等數從幸宮館輒為歌頌頌之擢為
諫大夫又使褒等之太子宮虞侍太子喜褒
所為甘泉及洞簫頌令後
宮貴人左右皆誦讀之

微斯文學問於虛儀夫子曰蓋聞國有道貧且賤焉恥
也今夫子閉門距躍專精趨學有日矣幸遭聖主平世
而久懷寶是伯牙去鍾期而舜禹遁帝堯也於是欲顯
名號建功業不亦難乎夫子曰然有是言也夫蚊蚋終
日經營不能越階序附驥尾則涉千里攀鴻鴈則翔四

海僕雖頑嚚願從足下雖然何由而自達哉文學曰陳
懿誠於本朝之上行話談於公卿之門夫子曰無介紹
之道安從行乎公卿文學曰何為其然也昔甯戚商歌
以干齊桓越石負芻而寤晏嬰非有積素累舊之歡皆
塗覲卒遇而以為親者也故毛嫱西施善毀者不能蔽
其好嫫母倭僂善譽者不能掩其醜苟有至道何必介
紹夫子曰咨夫特達而相知者千載之一遇也招賢而
處友者衆士之常路也是以空柯無刃公輸不能以斲

但懸曼矰蒲苴不能以射故膺騰撇波而濟水不如乘舟之逸也衝蒙涉田而能致遠未若遵塗之疾也才蔽於無人行衰於寡黨此古今之患唯文學慮之文學曰唯唯敬聞命矣於是相與結侶攜手俱游求賢索友歷于西州有二人焉乘輅而歌倚輶而聽之詠嘆中雅轉運中律嘽緩舒繹曲折不失節問歌者為誰則所謂浮游先生陳邱子者也於是以士相見之禮友焉禮文旣集文學夫子降席而稱曰俚人不識寡見尠聞曩從未

路望聽玉音竊動心焉敢問所歌何詩請聞其說浮游
先生陳邱子曰所謂中和樂職宣布之詩益州刺史之
所作也刺史見太上聖明股肱竭力德澤洪茂黎庶和
睦天人並應屢降瑞福故作三篇之詩以歌詠之也文
學曰君子動作有應從容得度南容三復白珪孔子睹
其慎戒太子擊誦晨風文侯喻其指意今吾子何樂此
詩而詠之也先生曰夫樂者感人心深而風移俗易吾
所以詠歌之者美其君術明而臣道得也君者中心臣

者外體外體作然後知心之好惡臣下動然後知君之
節趨好惡不形則是非不分節趨不立則功名不宣故
美玉蘊於砮砮凡人視之怏焉良工砥之然後知其和
寶也精練藏於鑛朴庸人視之忽焉巧冶鑄之然後知
其幹也況乎聖德巍巍蕩蕩黎氓所不能命哉是以刺
史推而詠之揚君美德深乎洋洋罔不覆載紛紜天地
寂寥宇宙明君之惠顯忠臣之節究皇唐之世何以加
茲是以每歌之不知老之將至也文學曰書云迪一人

使四方若卜筮夫忠賢之臣導主志承君惠據聖德而
化洪天下安瀾比屋可封何必歌詠詩賦可以揚君哉
愚竊惑焉浮游先生色勃皆溢曰是何言與昔周公詠
文王之德而作清廟建為頌首吉甫歎宣王穆如清風
列於大雅夫世衰道微偽臣虛稱者殆也世平道明臣
子不宣者鄙也鄙殆之累傷乎王道故自刺史之來也
宣布詔書勞來不怠令百姓徧曉聖德莫不霑濡厖眉
耆耆之老咸愛惜朝夕願濟須臾觀大化之淳流於是

皇澤豐沛主恩滿溢百姓歡欣中和感發是以作歌而詠之也傳曰詩人感而後思思而後積積而後滿滿而後作言之不足故嗟嘆之嗟歎之不足故詠歌之詠歌之不足不知手之舞之足之蹈之也此臣子於君父之常義古今一也今子執分寸而罔億度處把握而却寥廓乃欲圖大人之樞機道方伯之失得不亦遠乎陳邱子見先生言切恐二客慙膝步而前曰先生詳之行潦暴集江海不以為多鱣鯨並逃九罟不以為虛是以許

由匿堯而深隱唐氏不以衰夷齊恥周而遠餓文武不以卑夫青蠅不能穢垂棘邪論不能惑孔墨今刺史質敏以流惠舒化以揚名采詩以顯至德歌詠以董其文受命如絲明之如緡甘棠之風可倚而俟也二客雖室計沮議何傷顧謂文學夫子曰先生微矜于談道又不讓乎當仁亦未巨過也願二子措意焉夫子曰否夫雷霆必發而潛底震動枹鼓鏗鏘而介士奮竦故物不震不發士不激不勇今文學之言欲以議愚感敵舒先生

之憤願二生亦勿疑也於是文繹復集乃始講德文學
夫子曰昔成康之世君之德歟臣之力也先生曰非有
聖智之君惡有甘棠之臣故虎嘯而風寥戾龍起而致
雲氣蟋蟀俟秋吟蜉蝣出以陰易曰飛龍在天利見大
人鳴聲相應仇偶相從人由意合物以類同是以聖主
不徧窺望而視以明不殫傾耳而聽以聰何則淑人君
子人就者衆也故千金之裘非一狐之腋大厦之材非
一邱之木太平之功非一人之略也蓋君為元首臣為

股肱明其一體相待而成有君而無臣春秋刺焉三代
以上皆有師傅五伯以下各自取友齊桓有管鮑隰囂
九合諸侯一匡天下晉文公有咎犯趙衰取威定霸以
尊天子秦穆有由余五殺攘却西戎始開帝緒楚莊有
孫叔子反兼定江淮威震諸夏句踐有種蠡泄庸剋滅
彊吳雪會稽之恥魏文有段干田翟秦人寢兵折衝萬
里燕昭有郭隗樂毅夷破彊齊困閔於莒夫以諸侯之
細功名猶尚若此而況帝王選于四海羽翼百姓哉故

有聖賢之君必有明智之臣欲以積德則天下不足平也欲以立威則百蠻不足攘也今聖主冠道德履純仁被六藝佩禮文屢下明詔舉賢良求術士招異倫拔駿茂是以海內歡慕莫不風馳雨集藁雜竝至填庭溢闕含淳詠德之聲盈耳登降揖讓之禮極目進者樂其條暢怠者欲罷不能偃息匍匐乎詩書之門游觀乎道德之域咸潔身脩思吐情素而披心腹各悉精銳以貢忠誠允願推主上弘風俗而騁太平濟濟乎多士文王所

以寧也若乃美政所施洪恩所潤不可究陳舉孝以篤
行崇能以招賢去煩蠲苛以綏百姓祿勤增奉以厲貞
廉減膳食卑宮觀省田官損諸苑疎徭役振乏困恤民
災害不遑游宴閔耄老之逢辜憐縲絰之服事惻隱身
死之腐人淒愴子弟之縲匿恩及飛鳥惠加走獸胎卵
得以成育草木遂其零茂豈弟君子民之父母豈不然
哉先生獨不聞秦之時邪違三王背五帝滅詩書壞禮
義信任羣小憎惡仁智詐僞者進達佞諂者容入宰相

刻削大理峻法處位而任政者皆短於仁義長於酷虐
狼摯虎攫懷殘秉賊其所臨泣莫不肌慄懼伏吹毛求
疵並施螫毒百姓征徭無所措其手足嗷嗷愁怨遂亡
秦族是以養雞者不畜狸牧獸者不育豺樹木者憂其
蠹保民者除其賊故大漢之為政也崇簡易尚寬柔進
淳仁舉賢才上下無怨民用和睦今四海樂業朝廷淑
清天符既章人瑞又明品物咸亨山川降靈神光曜暉
洪洞朗天鳳皇來儀翼翼邕邕羣鳥並從舞德垂容神

雀仍集麒麟自至甘露滋液嘉禾櫛比大化隆洽男女
條暢家給年豐咸則三壤豈不盛哉昔文王應九尾狐
而東夷歸周武王獲白魚而諸侯同辭周公受柎鬯而
鬼方臣宣王得白狼而夷狄賓夫名自正而事自定也
今南郡獲白虎亦偃武興文之應也獲之者張武武張
而猛服也是以北狄賓合邊不恤寇甲士寢而旌旗什
也文學夫子曰天符既聞命矣敢問人瑞先生曰夫凶
奴者百蠻之最彊者也天性僇蹇習俗桀暴賤老貴壯

氣力相高業在攻伐事在獵射兒能騎羊走箭飛鏃逐
水隨畜都無常處鳥集獸散往來馳騫周流曠野以濟
嗜欲其耒耜則弓矢鞍馬播種則扞弦掌耔收秋則奔
狐馳兔穫刈則顛倒殪仆追之則奔遁釋之則為寇是
以三王不能懷五伯不能綏驚邊杞士屢犯芻蕘詩人
所歌自古患之今聖德隆盛威靈外覆日逐舉國而歸
德單于稱臣而朝賀乾坤之所開陰陽之所接編結沮
顏焦齒臯矚剪髮黥首文身裸袒之國靡不奔走貢獻

懽忻來附娑娑謳吟鼓腋而笑夫鴻鈞之世何物不樂
飛鳥翕翼泉魚奮躍是以刺史感懣舒音而詠至德鄙
人駢淺不能究識敬遵所聞未克殫焉於是二客醉于

仁義飽于盛德終日仰嘆怡懌而悅服

文選口頑嚚一
作嚚頑嚚誠作

懇誠斷作斷涉田而下有能字
鍊作練璞作朴黎作民美德作德美足作厥厦作夏咎

作舅渫作泄歡慕作勸思作德奉作俸削作峭肌慄作
飢栗征佂作佂佂民作人尚作上四海作海內耀作光

合作洽旌作旌旌先生曰作先生夫子曰
朝賀無賀字脰作振泉作淵克作剋

聖主得賢臣頌

夫荷旃披毳者難與道純綿之麗密羹藜含糗者不足
與論太牢之滋味今臣僻在西蜀生于窮巷之中長于
蓬茨之下無有游觀廣覽之知顧有至愚極陋之累不
足以塞厚望應明旨雖然敢不略陳愚心而抒情素記
曰恭惟春秋法五始之要在乎審已正統而已夫賢者
國家之器用也所任賢則趨舍省而功施普器用利則
用力少而就效衆故工人之用鈍器也勞筋苦骨終日
矻矻及至巧冶鑄千將之璞清水淬其鋒越砥歛其鐸

水斷蛟龍陸剝犀革忽若箠汜畫塗如此則使離婁督
繩公輸削墨雖崇臺五層延袤百丈而不溷者工用相
得也庸人之御駕馬亦傷吻弊策而不進於行胸喘膚
汗人極馬倦及至駕齧膝驂乘旦王良執靶韓哀附輿
縱騁馳驚忽如影靡過都越國蹶如歷塊追奔電逐遺
風周流八極萬里一息何其遼哉人馬相得也故服絺
綌之涼者不苦盛暑之鬱燠襲狐貉之煖者不憂至寒
之淒愴何則有其具者易其備賢人君子亦聖王之所

以易海內也是以嘔喻受之開寬裕之路以延天下之
英俊也夫竭智附賢者必建仁策索人求士者必樹伯
迹昔周公躬吐握之勞故有囿空之隆齊桓設庭燎之
禮故有匡合之功由此觀之君人者勤於求賢而逸於
得人人臣亦然昔賢者之未遭遇也圖事揆策則君不
用其謀陳見悃誠則上不然其信進仕不得施效斥逐
又非其愆是故伊尹勤於鼎俎太公困於鼓刀百里自
鬻甯子飯牛離此患也及其遇明君遭聖主也運籌合

上意諫諍則見聽進退得關其忠任職得行其術去卑
辱與潔而升本朝離疏釋蹻而享膏粱剖符錫壤而光
祖考傳之子孫以資說士故世必有聖智之君而後有
賢明之臣故虎嘯而風冽龍興而致雲螭蟀俟秋唵蜉
蝻出以陰易曰飛龍在天利見大人詩曰思皇多士生
此王國故世平主聖俊乂將自至若堯舜禹湯文武之
君獲稷契臯陶伊尹呂望之臣明明在朝穆穆列布聚
精會神相得益章雖伯牙操籊鍾蓬門子鸞烏號猶未

足以喻其意也故聖主必待賢臣而弘功業俊士亦俟明主以顯其德上下俱欲懽然交欣千載一會論說無疑翼乎如鴻毛遇順風沛乎若巨魚縱大壑其得意如此則胡禁不止曷令不行化溢四表橫被無窮遐夷貢獻萬祥必臻是以聖主不徧窺望而視已明不殫傾耳而聽已聰恩從祥風翔德與和氣游太平之責塞優游之望得遵游自然之藝恬淡無為之場休徵自至壽考無疆雍容垂拱永永萬年何必偃仰詘信若彭祖煦噓

呼吸如喬松眇然絕俗離世哉詩曰濟濟多士文王以

寧蓋信乎其以寧也

文選○旨漢書作指璞作撲鐸作

作綌狐貉作貂狐則作即谷風冽作冽風致雲氣作致雲游作蝟入作艾之臣二字無一會作壹合蓬作蓬彈

單作

甘泉宮頌

甘泉山天下顯敞之名處也前接大荆後臨北極左撫
仁鄉右望素域其宮室也仍截業而為觀攘抗岸以為
階壅波瀾而鱗坻馳道列以曲遠覽除閣之麗靡覺堂

金定四庫全書
卷十五
殿之巍巍徑落莫以差錯編玳瑁之文櫨鏤螭龍以造
牖采雲色以為楣神星羅於題鄂虹霓往往而繞棖縵
倏忽其無垠意能了之者誰竊想聖主之優游時娛神
而歛縱坐鳳皇之堂聽和鸞之弄臨麒麟之域驗符瑞
之貢詠中和之歌讀太平之頌

僮約

古文苑

蜀郡王子淵以事到煎上寡婦楊惠舍有一奴名便了
倩行酤酒便了捍大杖上冢巔曰大夫買便了時只約

守家不約為他家男子酤酒子淵大怒曰奴寧欲賣耶
惠曰奴父許人人無欲者子淵即決賣券之奴復曰欲
使皆上不上券便了不能為也子淵曰諾券文曰

神爵三年正月十五日資中男子王子淵從成都安志
里女子楊惠買夫時戶下髯奴便了決賣萬五千奴從
百役使不得有二言晨起洒掃食了洗滌居當穿曰縛
箒裁孟鑿井浚渠縛落鉏園研陌杜埤地刻大枷屈竹
作杷削治鹿盧出入不得騎馬載車踞坐大呶下牀振

頭垂釣刈芻結葦臘纒沃不酪住醢醢織履作簾黏雀
張鳥結網捕魚繳鴈彈鳬登山射鹿入水捕龜浚園縱
魚鴈鶩百餘驅逐鴟鳥持梢牧豬種薑養羊長育豚駒
糞除常潔餵食馬牛鼓四起坐夜半益芻二月春分被
隄杜疆落桑皮梭種瓜作瓠別茄披蔥焚槎發等壟集
破封日中早焚雞鳴起春調治馬驢兼落三重舍中有
客提壺行酤汲水作餉滌杯整按園中拔蒜斲蘇切脯
築肉臠羊膾魚鮓烹茶盡具脯已蓋藏關門塞竇餽

豬縱犬勿與鄰里爭鬪奴當但飯豆飲水不得嗜酒欲
飲美酒唯得染唇漬口不得傾盂覆斗不得辰出夜入
交關伴偶舍後有樹當裁作船上至江州下到煎主為
府掾求用錢推紡惡敗梭索綿亭買席往來都洛當為
婦女求脂澤販於小市歸都擔梟轉出旁蹉牽犬販鵝
武陽買茶楊氏池中擔荷往來市聚慎護姦偷入市不
得夷蹲旁卧惡言醜罵多作刀弓持入益州貨易牛羊
奴目交精患不得癡愚待斧入山斷槩裁轅若殘當作

俎机木屐及彘盤焚薪作炭石罍薄岸治舍蓋屋書削
代牘日暮以歸當送乾薪兩三束四月當坡五月當穫
十月收豆多取蒲苧益作繩索雨墮無所為當編蔣織
箔植種桃李梨柿柘桑三大一樹八赤為行果類相從
縱橫相當果熟收歛不得吮嘗犬吠當起驚告鄰里振
門挂戶上樓擊鼓倚盾曳鋌還落三周勤心疾作不得
遨遊奴老力索種莞織席事訖欲休當舂一石夜半無
事浣衣當白若有私歛主給賓客奴不得有奸私事事

當聞白奴不聽教當答一百讀券文徧訖詞窮咋索乞
乞叩頭兩手自搏目淚下落鼻涕長一尺當如王大夫
言不如早歸黃土陌蚯蚓鑽額早知當爾王大夫酤酒
真不敢作惡


祭金馬碧雞文

方士言益州有金馬碧雞之寶
可祭祀致也宣帝於是使褒往

馬祀

持節使者王褒謹拜南崖敬移金精神馬縹碧之雞處
南之荒深溪回谷非土之鄉歸來歸來漢德無疆廣于

唐虞澤配三王黃龍見兮白虎仁歸來歸來可以為倫
歸兮翔分何事南荒也



西漢文紀卷十三